

Headlines

- 1 सीनियर बीजेपी लीडर ते प्रधानमंत्री नरेंद्र मोदी होरें आखेआ, भारत लेई किश बी हासिल करना नामुमकिन नेई।
- 2 जम्मू-कश्मीर च प्रधानमंत्री नरेंद्र मोदी ते उत्तर प्रदेश दे मुखमंत्री योगी हुंदे आमद लेई कठुआ ते उधमपुर तैयारियां चला'रदियां न।
- 3 जम्मू पार्लिमानि हल्के च 17 लख 67 जहार शा बी मते वोटर 22एं मेदवारें दी किस्मत दा फैसला करडन। जम्मू-कश्मीर दे मुख चुनांऽ अधिकारी होरें मतदाताएं गी अपील कीती ऐ जे वोट पाने आले ध्याडे ओहू अगें आइयै वोट पाने दे अपने अधिकार दा इस्तेमाल करन।
- 4 चैत्र नराते अजै थमां शुरू होई गे न। मती गिनतरी च श्रद्धालुएं माता वैष्णो देवी दी पवित्र गुफा ते जम्मू दे दुए देवी द्वारें च मत्था टेकेया। प्रधानमंत्री, उपराज्यपाल होरें लोके गी नरातें दियां शुभकामनां भेंट कीतियां।
- 5 लोकसभा चुनाएं शा पैहलें चुनांऽ आयोग नै मतदाताएं आस्तै अपने 'मेदवार गी जानो ऐप' शुरू कीती ऐ। एहदा मकसद आपराधिक पशोक्कड आले मेदवारें दे बारै जानना ऐ।

<><><><><><>

PM-Achieve

भारती जनता पार्टी दे सीनियर लीडर ते प्रधानमंत्री नरेंद्र मोदी होरें आखेआ ऐ जे भारत नै एह साबित करी ओडेया ऐ जे किश बी हासिल करना नामुमकिन नेई। अज्ज पिलीभीत उत्तर प्रदेश च इक चुनांऽ रैली गी संबोधित करे होई मोदी होरें आखेआ जे लक्ष्य भामें जिन्ना मर्जी मुश्कल की नेई होवे जे भारत नै ध्यायी लेया ऐ जे हासिल करना गै करना तां फही पक्क उन्न हासिल करना गै। प्रधानमंत्री होरें आखेआ, इस्सै प्रेरणा ते उर्जा कन्नै उंदी सरकार भारत गी इक विकसित मुख्य बनाने लेई कम्म करा'रदी ऐ। मोदी नै आखेआ जे कांग्रेस सरकार दुनिया दे बाकी देसें थमां मदाद लेंदी ही, पर कोरोना महामारी दौरान भारत नै दुनिया भरै दे मुखें गी दोआइयां ते टीके भेजे हे। उनें आखेआ जे जिसलै देश सशक्त होना ऐ तां पूरी दुनिया उसदी अवाज सुनदी ऐ। विपक्ष दी नुक्ताचीनी करदे होई मोदी होरें आखेआ जे इंडी गठबंधन नै राम मंदरै दे निर्माणा विरोध कीता हा ते प्राण-प्रतिष्ठा दे साद्दे गी बी नकारी ओडेया हा ते पार्टी दे जिनें सदस्यें प्राण प्रतिष्ठा च शमूलियत कीती ही, उनेंगी पार्टी थमां निष्कासित करी दित्ता गेआ हा। उत्तर प्रदेश दे 8एं संसदीय चुनांऽ हल्के च लोकसभा चुनाएं दे पैहले गेड तैहत 19 अप्रैल गी वोट पोआए जाडन। एह चुनांऽ हल्के न-सहारनपुर, कैराना, मुजफ्फरनगर, बिजनौर, नगीना, मोरादाबाद, रायपुर ते पिलीभीत।

<><><><><><>

Rally-PM

प्रधानमंत्री नरेंद्र मोदी ते उत्तर प्रदेश दे मुखमंत्री योगी आदित्यनाथ हुंदी उधमपुर ते कठुआ च रैली दे मद्देनजर सब्बै लोडचदे बंदोबस्त कीते जा रदे न। प्रधानमंत्री होर 12 अप्रैल गी उधमपुर ते 10 अप्रैल गी योगी आदित्यनाथ होर कठुआ च रैली करडन। उत्तर प्रदेश दे मुखमंत्री योगी आदित्यनाथ होर कठुआ दे खेड्ए मैदान च बीजेपी दे उधमपुर लोकसभा सीट लेई मेदवार डॉ. जितेंद्र सिंह हुंदे समर्थन च रैली करडन। रैली आली थाहर दा दौरा लाने मगरा बीजेपी दे प्रदेश प्रधान रविंद्र रैना होरें दावा कीता जे योगी आदित्यनाथ हुंदी 10 अप्रैल आली रैली च खरी मती गिनतरी च लोक शामिल होडन। उनें आखेआ जे कठुआ, सांबा, जम्मू, उधमपुर ते जम्मू दे लोक योगी हुंदी आवाज सुनने गी बलगा रदे न। उनें आखेआ जे 2 लख थवां मते लोक 12 अप्रैल गी उधमपुर च प्रधानमंत्री हुंदी होने आली रैली च शामिल होडन। उनें आखेआ।

<><><><><><>

Jammu Parliament Constituency

जम्मू साम्बा रियासी लोकसभा सीट लेई दुए गेड तैहत 26 अप्रैल गी वोट पाए जाने न। इस हल्के लेई 22 मेदवार चुनांऽ मैदान च न। इनें मेदवारें दे सियासी भागें दा फैसला 17 लख 67 जहार 837 मतदाता करडन। आकाशवाणी जम्मू संवाददाता दी

रिपोर्ट मुजब आजाद मेदवार आर.के धर होरें अपना नामांकन वापस परताई लैता हा जेदे मगरा इस संसदीय हल्के लेई कुल 22 मेदवार चुनांस मैदान च रेई गए ना। इस संसदीय हल्के लेई जेडे प्रमुख मेदवार चुनांस मैदान च न उंदे च भारती जनता पार्टी दे जुगल किशोर, इंडियन नेशनल कांग्रेस दे रमण भल्ला, एकम सनातन भारत दल दे अंकुर शर्मा, जम्मू कश्मीर नेशनलिस्ट पीपल्स फ्रंट दे स्वामी दिव्या नंद ते नेशनल अवामी यूनाइटेड पार्टी दी महिला मेदवार शिखा बंद्राल होर शामिल ना। इस पार्लिमानी हल्के लेई 26 अप्रैल गी वोट पाए जाने ना। मेदवारें गी चुनांस निशान देने लेई प्रक्रिया रिटर्निंग अफसर आस्सेया पूरी करी लैती गेदी ऐ। जम्मू पार्लिमानी हल्का त्रै जिले जम्मू, साम्बा ते रियासी च फैले दा ऐ। एहदे च कुल 17 लक्ख 67 ज्हार 837 मतदाता न जिंदे च 9 लक्ख 15 ज्हार 10 मर्द, 8 लक्ख 52 ज्हार 796 महिलां ते 18 ट्रांसजेंडर मतदाता ना। इस संसदीय हल्के लेई 2 ज्हार 416 मतदान केंद्र बनाए गेदे ना।

<><><><><><>

CEO-JK

जम्मू-कश्मीर दे मुख् चुनांस अधिकारी पी.के पोले होरें आखेआ ऐ जे मतदान छड़ज साहडा हक्क नेई ऐ सगुआं साहडा फर्ज बी ऐ। आकाशवाणी जम्मू कन्नै खास गल्लबात च उनें नागरिकें गी अपील कीती जे ओहू उनें मतदाताएं गी अपील कीती जे ओहू वोट पाने आले दिन अगै आई वोट पाने दे अपने हक्क दा इस्तेमाल करन। उनें लोकें गी आखेआ जे ओहू विजन कुसै डर त्राह दे अपनी पसंद दे मेदवार गी वोट देन।

<><><><><><>

Migrant

जम्मू-कश्मीर सरकार नै कश्मीरी विस्थापित कर्मचारिएं लेई जेडे कश्मीर घाटी च तैनात न, लेई त्रै दिन दी खास कैजुअल लीव दी घोषणा कीती ऐ तां जे एहू लोक जम्मू उधमपुर ते दिल्ली च बनाए गेदे खास मतदान केंद्रें पर जाइए वोट पाई सकन। आदेश मुजब कश्मीरी विस्थापित कर्मचारी जेडे अनंतनाग, राजौरी पार्लिमानी हल्के कन्नै सरबंध रक्खदे न, ओहू 6 थवां 8 मई बश्कार कैजुअल लीव लेई सकदे ना। इस संदीय हल्के लेई 7 मई गी वोट पाए जाने ना। इसै चाल्ली श्रीनगर लोकसभा हल्के लेई 13 मई गी मतदान होना ऐ ते कर्मचारी 12 थवां 14 मई बश्कार अपनी छुट्टी लेई सकदे ना। बारामुला लोकसभा हल्के लेई एहू कर्मचारी 19 थवां 21 मई बश्कार अपनी विशेष कैजुअल लीव लेई सकदे ना। इस हल्के लेई 20 मई गी मतदान होना ऐ।

<><><><><><>

Navratri

मुख् दे होरनें हिस्सें आला लेखा जम्मू-कश्मीर च बी चैत्र नराते अज्जै थवां शुरू होई गे ना। नरातें दे चलदे सब्बनें देवी द्वारे गी शैल सनाकडे ढंगै नै सजाया गेदा ऐ। नरातें दे सरबंधे च केई सारे धार्मिक प्रोग्रामें दा सरिस्ता कीता जा रदा ऐ। नरातें च मां दुर्गा दे बक्ख-बक्ख स्वरूपें दी पूजा अर्चना कीती जंदी ऐ। रियासी जिले च स्थित श्री माता वैष्णो देवी जी दे मंदरै च मत्था टेकने लेई मुख् दे बक्ख-बक्ख हिस्सें थवां श्रद्धालु पुज्जा रदे ना। श्री माता वैष्णो देवी श्राइन बोर्ड आस्सेआ शत चंदी महा यज्ञ दा बी सरिस्ता कीता गेआ ऐ। ताई जम्मू च बावे आली माता श्राइन च माता काली दे मंदरै च बी बडुलै सवेला थवां गै श्रद्धालु पुज्जना शुरू होई गेदे हे। उत्थे बी श्रद्धालुएं दी खासी भीड़ दिक्खने गी लब्धी। कठुआ, सांबा, पुंछ, राजौरी, उधमपुर, डोडा, किशतवाड़ ते रामबन जिले दे मंदरें च बी श्रद्धालु पूजा-अर्चना लेई आवा रदे ना। सांबा दे डिप्टी कमिशनर अभिषेक शर्मा ते एसएसपी सांबा विनय शर्मा होरें चीची माता मंदर च मत्था टेकेआ ते कंजक पूजन कीता। इस मौके पर बोलदे होई डिप्टी कमिशनर होरें आखेआ। प्रधानमंत्री नरेंद्र मोदी ते जम्मू-कश्मीर दे उपराज्यपाल मनोज सिन्हा होरें बी लोकें गी चैत्र नरातें दियां शुभकामनां दित्तियां ना।

<><><><><><>

Election-Special Story

इस्सलै जिस्सलै के तकनीक नै लोकें दे जीवन च इक अंह थाहर बनाई लैंदा ऐ, चुनांस आयोग धरतै दा सब्बनें शा बड्डा लोकतांत्रिक अभ्यास आयोजित करने लेई पूरी चाल्ली तैयार ऐ ते मतदाताएं दी सखाल आस्तै केई हीले बी कीते जा रदे ना। चुनांस आयोग आस्सेआ “Know your Candidate” नां कन्नै शुरू कीती गेदी ऐप मतदाताएं गी एहू दस्सोग जे उंदे मेदवार दी पशोक्कड़ केहू ऐ-उनें कदे कनून दी बरखलाफी ते नेई कीती दी। एहू ऐप एंड्रायड ते आई-फोन दौनें पर उपलब्ध रौग ते इसी इस्तेमाल करना बडा सखल्ला ऐ। मतदाता गी छड़ा चुनांस दी किस्म ते अपने इलाके दा नां लिखना होग ते कुसै बी मेदवार दे

बारे च सर्च राहें पता कीता जाई सकदा ऐ। इस ऐप गी चुनांऽ आयोग दी वेबसाइट परां, गुगल प्ले स्टोर जां एप्पल ऐप स्टोर थमां डाउनलोड कीता जाई सकदा ऐ।

<><><><><><>

EC-WB

चुनांऽ आयोग नै गृह मंत्रालय गी पच्छिम बंगाल च निर्पक्ख ते आजादाना लोकसभा चुनांऽ करोआने ताई केंद्रीय सशस्त्र नीम फौजी बल सी.ए.पी.एफ दियां 100 होर कंपनियां तैनात करने ते निर्देश दित्ते ना। सूत्रें दस्सेया जे गृह मंत्रालय नै चुनांऽ आयोग दे निर्देशें पर सी.आर.पी.एफ दियां 55 ते सीमा सुरक्षाबल दियां 45 कंपनियां अगुै गै तैनात कीती दियां ना। सूत्रें दस्सेआ ऐ जे अधिकारिणं गी पच्छिम बंगाल च इस म्हीने दी 15 तरीक तगर सी.ए.पी.एफ दियां बाद्दू 100 कंपनियां तैनात करने दे निर्देश दित्ते गे ना।

<><><><><><>

Debate-Competition

भारती फौज नै रामबन जिले दे गूल इलाके च विद्यार्थिणं आस्तै इक अंतर स्कूल वाद-विवाद प्रतियोगिता करोआई गई। प्रतियोगिता च 6एं कुडिणं समेत 20एं स्थानीय विद्यार्थिणं हिस्सा लैता ते समाज पर असर पाने आले ज्वलंत मसलें पर अपने-अपने बवचार रक्खे ते उंदे खरे ते माढे प्रभावे गी उजागर कीता। इस प्रतियोगिता च सोशल मीडिया दी शिक्षा गी बेहतर बनाने च भूमिका बारै बी गल्लकत्थ कीती गई।

<><><><><><>

World Health Day

सेना नै रियासी जिले दे दूर-दरेडे कायनडोरा ते गुलाबगढ इलाके च रौहने आले लोके दे कल्याण लेई इक मेडिकल गश्त दा आयोजन कीता। एह मन्नेया जंदा ऐ जे उच्चिणं धारके बसने आले बुजुर्ग, महिलां ते न्याणें बुनियादी सेहत सहूलते थमां बंचत रेही जंदे ना। मेडिकल गश्त दा मकसद इय्यै नेह लोके गी उंदे घरे कश जाइये सेहत सहूलतां हासल करोआना हा। सेना दी इस पैहलकदमी कन्नै सब्भने आयु वर्ग दे 106एं जनें दा ईलाज मुआलजा कीता गेआ। मेडिकल कश्ती टीम नै ग्राई लोके गी जरूरत आलियां दोआइयां ते सेहत सरबन्धी सलाह मश्वरे दित्ते। सेना दी इस पैहलकदमी कन्नै नां छडा इलाके दे लोके दी सेहत ठीक होग, सगुआं सेना कन्नै उंदा इक राबता बी कायम होग।

<><><><><><>

Adolescence Nutrition

सैनिक स्कूल नगरुटा दियां वाइस प्रिंसीपल डॉ. विश्व भारती सलोट होरें 5 जम्मू-कश्मीर बटालियन एनसीसी दे 500 कैडेटें गी एनसीसी ट्रेनिंग अकेडमी नगरुटा च सालाना सिखलाई कैंप दौरान संबोधित कीता। डॉ. सलोट होरें एनसीसी कैडेटें गी किशोरावस्था च लोडचदी खुराक, गिजा सरबन्धी आदतें ते संतुलित खान-पान बारै जागरूक कीता।

<><><><><><>